

Uunga siunnersuut: Tipsernermit lottornermillu iluanaarutinit agguaassisarneq pillugu Inatsisartut inatsisaat nr. x, xx. Xxxxx 2005-imeersoq*Kapitali 1
Agguaanneqartarnerat*

§ 1. Pinnguaatit, eqqorniaasitsinerit eqquiniunnerillu ilaat pillugit inatsit naapertorlugu pissarsiassat ukiumoortumik Kalaallit Nunaannut pisassanngortinneqartartut Naalakkersuisut tamanut iluaqutaasussamik siunertanut makkununga agguaatissavaat:

- 1) 50%-ii timersornernut tamanit peqataaffigineqarsinnaasunut, innarluutillit utoqqaallu timersornerat ilanngullugu,
- 2) 9,1%-ii piukkunnaatillit pikkorinnerillu timersornerinut,
- 3) 13,6%-ii meeqqat inuusuttullu peqatigiiffinut, aamma
- 4) 27,3%-ii tamanut iluaqutaasussamik siunertanut allanut, taamatuttaaq kulturimut tunngatillugu siunertanut, inunnik qaammarsaanermut siunertanut, nappaatinik akiuiniarnermut pinaveersaartitsinermullu siunertanut, inooqatigiinnermut tunngasunut siunertanut, asimiititsinissanik siunertanut aamma tamanut iluaqutaasussamik ilisimatusarniarluni siunertanut.

Imm. 2. Aningaasat Kalaallit Nunaanni tipsernermit lottornermillu naalagaaffimmut akitsuutip 2004-mi atorunnaarsinneqartup annertoqatai siunertanut imm. 1-imi taaneqartunit allaanerusunut atorneqarsinnaapput.

Imm. 3. Naalakkersuisut aningaasaateqarfinnut suliniaqatigiiffinnullu allanut tipsernermit lottornermillu iluanaarutinik tamanut iluaqutaasussamik siunertanut agguaassisartunut imm. 1-imi taaneqartutut tamanut iluaqutaasussamik siunertanut tapiissuteqartoqarsinnaatillugu ani-ngaasanik tunissuteqarnissaq pillugu isumaqatigiissuteqarsinnaapput. Aningaasanik tunissutissatut isumaqatigiissutigineqartut pissarsiassanit ukiumoortumik Kalaallit Nunaannut pisassanngortinneqartunit imm. 1-imi taaneqartutut agguaassisoqartinnagu ilanngaatigineqassapput.

§ 2. Atugassanngortitat § 1, imm. 1-imi taaneqartut imatut agguaanneqassapput:

- 1) Atugassanngortitat § 1, imm. 1, nr. 1-imi taaneqartut Kalaallit Nunaanni Timersoqatigiit Kattuffiannut, timersornernut tamanit peqataaffigineqarsinnaasunut, innarluutillit utoqqaallu timersornerat ilanngullugu, agguaasseqqinnermik isumaginnittussamut agguaanneqassapput.
- 2) Atugassanngortitat § 1, imm. 1, nr. 2-mi taaneqartut Team Grønlandimut, piukkunnaatillit pikkorinnerillu timersornerinut agguaasseqqinnermik isumaginnittussamut agguaanneqassapput.
- 3) Atugassanngortitat § 1, imm. 1, nr. 3-mi taaneqartut Sorlammut, meeqqat

inuusuttullu pe-qatigiiffiit agguasseqqinnermik isumaginnittussamut agguanneqassapput, aamma

4) Atugassanngortitat § 1, imm. 1, nr. 4-mi taaneqartut qinnuteqaateqartoqarneratigut Naalackersuisunit agguanneqassapput.

Imm. 2. Imm. 1, nr. 1-3-mi atugassanngortitat taaneqartut agguateqqinneranni allaffissornikkut aqutsineq Naalackersuisut tigusinnaavaat imatut pisoqartillugu:

1) Soqutigisaqaqatigiiffiup Naalackersuisut taamaaliortoqarnissaanik kissaateqarfippagit.

2) Pingaarutilimmik aalajangersimasumillu tunngavilersukkamik soqutigisaqaqatigiiffik suliassaminik isumaginnissinnaajunnaarsorineqalerpat.

Kapitali 2

Suliassat suliarineqarnerat tapiiffigineqarnissamullu piumasaqaatit

§ 3. Pisortat ingerlatsineranni suliassat suliarineqarnerat pillugu Inatsisartut inatsisaanni pisortat ingerlatsineranni tamanut saqqummiussisussaataaneq pillugu inatsisartut inatsisaanni aammalu Inatsisartut Ombudsmandiat pillugu inatsisartut inatsisaanni aalajangersakkat § 2, imm. 1, nr. 1-imiit 3-mut soqutigisaqaqatigiiffinnut taaneqartunut atuupput taakku Inatsisartut inatsisaat manna taannalu malillugu malittarisassat atuuttussanngortinneqartut naapertorlugit Naalackersuisut sinnerlugit aalajangiinissamut piginnaatitaaffilerneqarsimappata.

§ 4. Inunnut nunami maani najugaqartunut imaluunniit peqatigiiffinnut, soqutigisaqaqati-giiffinnut, suliffeqarfinnut, oqartussaasunut il.il. Kalaallit Nunaanni angerlarsimaffeqartunut taamaallaat tapiissuteqartoqarsinnaavoq.

Imm. 2. Imm. 1-imi aalajangersagaq apeqqutaatinnagu Team Grønland inunnut Kalaallit Nunaata avataani najugalinnut tapiissuteqarsinnaavoq tapiissutisissat Naalackersuisunit timersornermut piukkunnaatilittut imaluunniit timersortartutut pikkorinnertut akuersissutigineqarsimappata.

Kapitali 3

Nakkutilliineq

§ 5. Soqutigisaqaqatigiiffiit § 2, imm. 1, nr. 1-imiit 3-mut taaneqartut kingusinnerpaamik 1. juunimi Naalackersuisunut ukiumut naatsorsuuteqarfiusumut qaangiuttumut naatsorsuutitik kukkunersiorneqarsimasut naatsorsuutinullu atortussat allat nassiuutissavaat. Naatsorsuutit ukiumi qaammatisiuteqarfiusumi qaangiuttumi atugassanngortinneqartunit agguanneqarsimasut naatsorsuutaannik kukkunersiuisumit naalagaaffimmit akuerisaasumit imaluunniit nalunaarsorneqarsimasumit atsiorneqarsimasunik ilanngussivigineqassapput.

Imm. 2. Naatsorsuutit, naatsorsuutinut atortussat allat naatsorsukkallu imm. 1-imi taaneqartut piffissaq eqqorlugu tiguaneqanngippata, imaluunniit Naalackersuisut paasippasuk tipsernermit lottornermillu iluanaarutit siunertanut naapertuuttumik, § 1, imm. 1 takuuk, atorneqanngitsut, Naalackersuisut tipsernermit lottornermillu

iluanaarutinit soqutigisaqaqatigiiffinnut siunissami akiliutigineqartussat kinguartissinnaavaat naatsorsuutit, naatsorsuutitut atortussat allat naatsorsukkallu nassiunneqareerserlugit imaluunniit tipsernermit lottornermillu iluanaarutit siunertanut naapertuuttumik atorneqarnissaat isumannaarneqareerserlugu. Naalackersuisut akiliutigineqartussat kinguartinneqarnerannut atatillugu atugassangortinneqartunik agguasseqqittarnerup allaffissornikkut aqunneqarnera tigugallarsinnaavaat.

§ 6. Tapiissutisisartut soqutigisaqaqatigiiffiillu § 2, imm. 1, nr. 1-imiit 3-mut taaneqartut piumaffigineqarnermikkut paasissutissat atorfissaqartinneqartut tamaasa Naalackersuisunut nassiuttassavaat, taamatuttaaq qinnuteqaatit, aalajangiinerit, agguassinnermut najoqqutassat, ilaasortat amerlassusiat, akiliutit il.il. pillugit paasissutissat.

§ 7. Tapiissutigineqartut tamakkiisumik ilaannakuusumilluunniit utertillugit akileqquneqarsinnaapput, qinnuteqaateqartoq eqqunngitsunik paasissutissiisimappat, tapiissuteqarnissamat piumasaqaatit naammassineqarsimanngippata imaluunniit suliarineqartartut sinneqartoortaaasimappata.

Kapitali 4

Piginnaatitsissutit

§ 8. Naalackersuisut qinnuteqaatinut piumasaqaatit pillugit erseqqinnerusunik malittarisassanik aalajangersaasinnaapput, taamatuttaaq qinnuteqaatit suliarineqassappata piumasaqaataassasoq qinnuteqaateqartut uppersaasissanik saqqummiussissasut tassaasunik pilersaarutit allaaserineqarnerinik, missingersuutinik, ilaasortat amerlassusiinik, suliasatut pilersaarutinik assigisaannilluunniit.

Imm. 2. Naalackersuisut naatsorsuutinik tunniussisarneq pillugu erseqqinnerusunik malittarisassanik aalajangersaasinnaapput, tassunga ilanngullugu allat § 2, imm. 1, nr. 1-imiit 3-mut soqutigisaqaqatigiiffiit taaneqanngitsut naatsorsuutinik saqqummiussissasut, tipsernermit lottornermillu iluanaarutinit pissarsisimagunik.

Imm. 3. Naalackersuisut tipsernermit lottornermillu iluanaarutinik agguassisarneq pillugu paasissutissiisarnermut tipsernermit lottornermillu iluanaarutinik atuisarneq pillugu erseqqinnerusunik malittarisassanik aalajangersaasinnaapput.

Kapitali 5

Atuutilerfia

§ 9. Inatsisartut inatsisaat 1. juli 2006-imi atuutilerpoq.

Imm. 2. Inatsisartut inatsisaata atuutilerfatigut tipsernermit lottornermillu iluanaarutinik agguassisarneq pillugu Inatsisartut inatsisaat nr. 13, 11. novembari 2000-imeersoq atorunnaarsinneqarpoq.

Imm. 3. Malittarisassat, tipsernermit lottornermillu iluanaarutinik agguassisarneq

pillugu Inatsisartut inatsisaat nr. 13, 11. november 2000-imeersoq najoqqutaralugu aalajangersarneqartut atuutiinnassapput matumani imaluunniit Inatsisartut inatsisaanni allani inatsisinik tunngaveqarluni malittarisassatigut aalajangersarneqartutigit taarserneqarnissamik atorunnaarsinneqarnissamilluunniit tungaanut.

Namminersornerullutik Oqartussat, ulloq xx. xxxx 2006

Hans Enoksen

/

Doris Jakobsen